

17. oktober 2025

UKA2025/171+172

Meeqqat 18-inik ukioqalernissami tungaanut pisortat ingerlataannik angalatitsiviit aqutigalugit angalasussaatillutik meeqqatut akeqalernissaat, aningaasatigut qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq meeqqat akikinnermik angalasarnerannut malittarisassat allanngortinnissaannik tunngaviliissaaq, kingusinnerpaammilu UPA2026-mi inatsisartunut saqqummiunneqassalluni.

(Inatsisartunut ilaasortaq Jens NapätôK, Naleraq)

Soraarninngornikut pisortat ingerlataannik angalatitsiviit aqutigalugit akikinnerusumik angalasinnaanerit ukioq naallugu atuutilerpat aammalu soraarnerussutisiaqartunut billetsit ukioq kaajallallugu killeqanngitsumik pisiassaasinnaalerpata, soraarnerussutisiaqartut akikinnerusumik angalasarnerannut malittarisassat allanngortinnissaat siunertaralugu, qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq kingusinnerpaamik UPA2026-mi inatsisartunut saqqummiunneqassaaq.

(Inatsisartunut ilaasortaq Jens NapätôK, Naleraq)

Naleqqameersup Jens Napätûp meeqqat soraarninngornikullu pisortat angallassissutaanni akikinnerusumik angalasinnaanngornissaannik siunertaqartumik Naalakkersuisut misissuinissaannik Inatsisartut aalajangiiffigisassaattut siunnersuutaannut Siumumiit qujavugut, taakkualu Siumumiit imaattumik oqaaseqarfigissavarput.

Nunarput isorartoorujussuuvuq innuttaasullu siammasissumik najugaqarnerat qutsatissaavoq illersorneqartariaqarlunilu. Siammasissumik najugaqariaaseqarnitta ilaatigut angalaniarnikkut atugassarititaasut unammillernartumiisinnaasarnert ilisimavarput – uani angallassissutit akillu pineqaannarnerisigulluunniit.

Inuiaqatigiittut siammasissumik najugaqartiteralarluta immitsinnut tikittuarsinnaanerput qulakkeerniartuartariaqaripput Siumumiit isumaqarpugut, taamaammallu angallannikkut periarfissat akiviusut atorlugit ajornarsinnaanerusutut inissisimatitsisussaagaluit



kiffartuussinissamik isumaqatigiissusiornikkut angallannikkut akit innuttaasunut akileruminarnerusunngorlugit aaqqissuussisarnerit Siumumiit pingaartutut isumaqarfigaarput, taamaattuartariaqartorlu isumaqarluta.

Siumumi soqutigaarput erseqqissumik paasisaqarfigissallugit meeqqanut akikillisaatit maanna ukiunut 12-inut killigitinneqartut meeqqanut 18-it ataallugit ukiulinnut qaffallugit aningaasatigut qanoq naleqassanersoq paasisaqarfigissallugu, taamatullu assinganik soraarninngornikut akikinnerusumik angalasinnaanerit ukioq naallugu atuutilernissaa aammalu soraarninngornikunut bilitsit ukioq naallugu killeqanngitsumik pisiassaasinnaanerat aningaasatigut qanoq naleqassanersoq paasisaqarfigissallugu.

Siunnersuummi misissorniarneqartut anguniarneqartullu isumaqataaffigaagut, taamaattoq angalatitsiviit pisortanit pigineqartut kisiisa pinngikkaluarlugit kiffartuussinissamik isumaqatigiissuteqarfigineqartut tamarmik misissuinermit ilaatinneqarnissaat Siumumiit isumaqarfigaarput, taamaaliornikkut assilissap ilivitsuusup pissarsiarineqarnissaa timitalerneqassammat Siumup isumaa naapertorlugu.

Siumumiit taamatut oqaaseqarluta siunnersuutit taakku marluk Sanaartornermut ataatsimiititaliami suliareqqitassanngornissaat inassutigaarput.

Anders Olsen, Siumut